

ARREST DV CONSEIL D'ESTAT,

7. VIII. 1641

PORTANT DE'CRY DES
Pistoles d'Espagne & d'Italie legeres
apres le dernier iour de Septembre
prochain : & inionction de les porter
ou enuoyer en la Monnoye du Mou-
lin dans ledit temps , sur les peines y
mentionnées, &c.



A PARIS,
Chez SEBASTIEN CRAMOISY,
Imprimeur ordinaire du Roy, & de
la Cour des Monnoyes, rue sainte
Iacques, aux Cicognes.

M. DC. XLI.

Avec Privilege de sa Maieité.

Case

F

39

,326

1641f

THE NEWBERRY
LIBRARY



*EXTRACT DES
Registres du Conseil d'Estat.*

S V R ce qui a esté re-
présenté au Roy en
son Conseil, que les
particuliers qui ont
de l'or leger negligent de le por-
ter à la Monnoye du moulin éta-
blie aux Galeries du Louvre,
pour le faire conuertir en espe-
ces de Louis, dans l'esperance
qu'ils ont que sa Majesté conti-
nuera encor le delay pour l'ex-
position de l'or leger apres le
dernier Septembre prochain,
qui est le terme porté par l'Ar-

A ij

rest du Conseil du 23. Mars dernier ; ce qui retarde la fabrication , & faict chomer les ouuriers : & que mesmes il y a pour de grandes & notables sommes de deniers en especes de Louis entre les mains du Commis de l'Espargne estably en ladite Monnoye , que sa Maiesté a fait mettre en fonds pour le soulagement des particuliers , & acceleration du cōuertissement desdites especes legeres : qui demeurent inutiles , faute par les particuliers d'apporter leur or , & retirer en mesme temps des especes de Louis dudit Commis de l'Espargne , pour la valeur de leur or , ainsi qu'il luy est ordonné . A quoy il est necessaire de pour-

5
voir. LE ROY en son Conseil a
ordonné & ordonne, conformément
audit Arrest du Cōseil du
23. Mars dernier, qu'après le der-
nier Septembre prochain, sans
qu'il soit accordé aucun autre
terme ny delay, que toutes les
Pistoles d'Espagne & d'Italie le-
geres demeureront décriées de
tout cours & mise; & ceux qui
s'entrouueront saisis seront pu-
nis comme faux Monnoyeurs; &
lesdites especes confisquées au
profit de la Majesté, sur lequel
sera pris le tiers pour le dénon-
ciateur. ORDONNE sadite Maje-
sté à tous les particuliers qui en
ont en leurs mains, de les porter
ou enuoyer en ladite Monnoye
du Moulin dans ledit temps, si

bon leur semble, pour estre con-
uertis en especes de Louis, &
leur en estre donné en mesme
temps la valeur en Louis par le-
dit Cōmis de l'Espargne, suiuant
la Declaration de sadite Majesté
enregistrée en la Cour des Mon-
noyes le 11. Oôtobre dernier ;
Et quant aux Pistoles moulées,
sadite Majesté les a décriées dès
à present de tout cours & mise ;
Ordonne qu'elles seront portées
en ladite Monnoye pendant vn
mois pour y estre fonduës en
presence des Commissaires esta-
blis par sadite Majesté en ladite
Monnoye, & la iuste valeur d'i-
celles renduë suiuant les essais qui
en seront faits ; Faisant tres-ex-
presses defences à toutes person-

nes de les exposer; à tous Orfeures, Changeurs, Affineurs, Tireurs d'or, & autres de les acheter, ny en faire aucun trafic, à peine de la vie: Voulant sadite Majesté que le tiers de la confiscation des coupables appartienne audit dénonciateur. Et quant aux Escus d'or legers, ordonne sadite Majesté aux particuliers de les porter à ladite Monnoye au Moulin, pour estre conuertis en autres Escus d'or de poids qui seront fabriquez audit Moulin, la valeur desquels sera donnée par ledit Commis de l'Espargne, suivant ladite Declaration. Et sera le présent Arrest publié & affiché par tous les Carrefours, à ce que nul n'en pretende cause

d'ignorance. Fait au Conseil
d'Estat du Roy tenu à Paris le 7.
iour d'Aoust 1641.

Signé, GALLAND.

Le Mercredy 14. iour d'Aoust 1641.
L'Arrest cy-dessus de Nosseigneurs du
Conseil d'Estat du Roy a esté leu & pu-
blié à son de Trompe & Cry public,
par moy Iean Iossier Iuré Crieur ordi-
naire du Roy en la Ville, Preuosté &
Vicomté de Paris, par les Carrefours or-
dinaires & extraordinaires de cette Ville
& Faux-bourgs de Paris, & autres
places publiques. A ce faire i'estois ac-
compagné de trois Trompettes commis de
Pierre Gilbert, Gentien le Chable, &
Noiret Iurez Trompettes du Roy esdits
lieux. Signé, IOSSIER.